




**REPUBLIKA E KOSOVES / REPUBLIKA KOSOVA / REPUBLIC OF KOSOVO**  
**AGJENCIJA KUNDER KORRUPSIONIT**  
**AGENCIJA PROTIV KORUPCIJE**  
**ANTI-CORRUPTION AGENCY**

Dep.	2-D / DPK	Nr Prot.
Dep.		Br Prot.
Dep.		Prot No.
Nr. i faq.	03	27-03-2015
Broj stranica		Data
Versija		Datum

**Republika e Kosovës**  
PRISHTINE  
**Republika Kosova - Republic of Kosovo**



**AGJENCIJA KUNDËR KORRUPSIONIT**  
**AGENCIJA PROTIV KORRUPCIJE**  
**ANTI - CORRUPTION AGENCY**

Në mbështetje të nenit 11 (paragrafi 1.1), nenit 5 (paragrafi 1 pika 1.5) të Ligjit nr. 03/L-159 për Agjencinë kundër Korrupsionit, nenit 18 (paragrafi 4, 8 dhe 12) të Ligjit nr. 04/L-051 për parandalimin e konfliktit të interesit në ushtrimin e funksionit publik, si dhe nenit 19 (paragrafi 11) të Rregullores nr. 01/2014 së Punës të Agjencisë kundër Korrupsionit, Drejtori i Agjencisë kundër Korrupsionit me datë 27.03.2015 mori:

### V E N D I M

**I. Ekziston konflikt i interesit “rast për rast” për zyrtarin e lartë Masar Lluka - Anëtar i Kuvendit të Komunës së Gjakovës, në rastin e votimit për fillimin e procedurave ligjore për dhënien në shfrytëzim të pronës komunale në Komunën e Gjakovës.**

**II. Agjencia do të kërkoj fillimin e Procedurës për Kundërvajtje nga Gjykata kompetente.**

**III. Të gjitha vendimet që i nxjerr Agjencia lidhur me konfliktin e interesit bëhen publike në ueb faqen zyrtare të Agjencisë.**

**IV. Ky vendim hyn në fuqi ditën e nënshkrimit.**

### A r s y e t i m

**I. Bazuar në Ligjin për Parandalimin e Konfliktit të Interesit në Ushtrimin e Funksionit Publik Nr.04/L-051 (në tekstin e mëtejmhë Ligji PKI), nën dyshimin e bazuar për Konflikt Interesi, është inicuar rasti me nr. AKK -03-02-196/15 për zyrtarin e lartë Masar Lluka i cili ushton funksionin publik të Anëtarit të Kuvendit të Komunës së Gjakovës.**

Pas pranimit të informacionit për dyshimin e ekzistimit të konfliktit të interesit sipas të cilit z. Masar Lluka ka marrë pjesë në mbledhjen e Kuvendit Komunal të datës 27.11.2014, në të cilën, një ndër pikat që është diskutuar ka qenë edhe shqyrtimi i kërkesës së kompanisë “Hirano Mushroom” Shpk, për ndarjen e një parcele për kultivimin e këpurdhave “shitake”, z. Lluka është njoftuar me një shkresë zyrtare nga Agjencia kundër Korrupsionit, për fillimin e shqyrtimit të gjendjes së konfliktit të interesit.

Pas pranimit të kësaj shkresë, z. Lluka është takuar me zyrtarët e AKK-së dhe është njoftuar me faktet që posedon Agjencia për këtë rast.

Dyshimi për ekzistimin e konfliktit të interesit ka qenë sepse djali i z. Lluka ushtron funksion menaxherial në biznesin privat “Hirano Mushroom” Shpk.

Zyrtari i lartë z. Lluka gjatë takimit me zyrtarët e AKK-së ka pranuar se ka marrë pjesë në këtë mbledhje mirëpo ka dekluaruar se nuk e ka ditur që kjo situatë mund të paraqes konflikt interesit.

Neni 13 i Ligjit për Parandalimin e Konfliktit të Interesit, në pikën 1, përcakton se:

*1. Çdo zyrtar i lartë gjatë ushtrimit të funksionit të tij publik, në bazë të njohurive të tij dhe në mirëbesim, detyrohet që të bëjë vet deklarimin paraprak, rast për rast, të ekzistencës së interesit të tij privat lidhur me vendimmarrjen në një çështje të caktuar, që mund të bëhen shkak për lindjen e një konflikti të interesit.*

Përveç kësaj Ligji PKI në nenin 9 ka paraparë veprimet e ndaluara për zyrtarët e lartë. Pika 1.9 e këtij nenit parasheh se zyrtarit të lartë, gjatë ushtrimit të funksionit publik i ndalohet që të ndërmarr veprime të cilat në ndonjë mënyrë do të përshtaten interesit personal të tij apo interesit të personave të afërt apo të besueshëm.

Po ashtu edhe Ligji (Nr. 03/L-040) për Vetqeverisjen Lokale parasheh rastet kur anëtarë i kuvendit të komunës duhet të tërhiqet nga mbeldhjet e kuvendit komunal. Neni 38 (pika 1 dhe 2) i këtij ligji shprehimisht përcakton:

*38.1 Anëtarë i kuvendit të komunës apo anëtarë i komitetit nuk mund të jetë pjesëmarrës në marrjen e vendimeve dhe në procedurat administrative që kanë të bëjnë me cilëndo çështje në të cilën ai ose ajo, apo ndonjë anëtar i afërt i familjes së tij apo saj, ka interes personal apo material.*

*38.2 Çdo anëtar duhet t'i shfaqë të gjitha konfliktet e interesit që lindin në çdonjëren prej mbledhjeve në të cilën është prezent. Çdo këshilltar mund të ofrojë informacione për interesat e anëtarit tjetër.*

Duke pasur parasysh dipozitat e lartcitura, z. Lluka është dashur të deklaroj konfliktin e interesit dhe të tërhiqet nga kjo mbledhje.

**II.** Sipas Ligjit për Parandalimin e Konfliktit të Interesit, nenit 20, pika 1, “*Çdo shkelje e detyrimeve të përcaktuara me këtë ligj, kur nuk paraqet vepër penale, paraqet kundërvajtje dhe dënohet me gjobë sipas kufijve të përcaktuuar në paragrafin 1.1, 1.2 dhe 1.3*”.

Sipas Nenit 20 pika 2, “*Për shkelje të detyrimeve të përcaktuara me këtë ligj, zyrtarit të lartë publik, udhëheqësit apo drejtuesit të institucionit udhëheqës, përveç dënimit gjykata mund t'i shqiptoj edhe masën mbrojtëse; ndalimi i ushtrimit të funksionit publik në kohëzgjatje prej tre (3) muaj deri në një (1) vit*”.

**III.** Sipas Nenit 18 paragrafi 12, të gjitha Vendimet që i nxjerr Agjencia lidhur me konfliktin e interesit bëhen publike në ueb faqen zyrtare të Agjencisë.

Andaj u vendos si në dispozitiv të këtij vendimi.

Vendimi iu dërgohet:

- Zyrtarit të lartë publik
- Drejtorit të DPK-së
- Z./zpj. (zyrtari përgjegjës)
- Z./ zpj. (zyrtari ndihmës)

Drejtor i Agjencisë kundër Korrupsionit

Hasan Preteni

